



UKA 2017/125  
10. okt. 2017  
Bendt B. Kristiansen

**Pillugu: Kalaallit Nunaata pigisaanik sillimmasiisarfimmik pilersitsinerup iluaqutissartai aammalu aporfissarisinnaasaasa misissorneqarnissaanik, ilanngullugu pilersitsinerup suut piумаqatitariumaagai, soorlu aningaasartuutissat aammalu sulisussat pillugit Naalakkersuisut peqquneqassasut inatsisartut aalajangiiffigisassaattut siunnersuut.**

(Inatsisartunut ilaasortaq Anthon Frederiksen)

Inuiaqatigiit aningaasaatitta nunap iluani kaavitittuarnissaat erniortissinnaajuarnissaallu inatsisiliortutut qulakkeerniagassarivarput.

Susasaqarfik sillimmasiisarnermut tunngasoq maanna qallunaat naalagaaffiata tamakkiisumik susasaqarfigaa, Namminersornermut Inatsit malillugu isumaqatiginniutigereerneratigut nunatsinnut angerlaanneqarsinnaasoq.

Namminersorlutik Oqartussat aammalu Namminersorlutik Oqartussat suliffeqarfiutaasa sillimmasiinermut ukiumut aningaasaliissutigisartagaat kr. 67 mio. sinnerlugit annertussuseqartut sumi sillimmasiisarfimmi, nunap avataani uninngavimminni erniorput nunamut sumiiffimminni aningaasaqarnermut iluaqutaallutik. Taakku saniatigut inuit ataasiakkaat namminersorlutillu ingerlataqartut ilanngukkutsigit aningaasat ukiumut sillimmasiunneqartartut taaneqartunit amerlanerussaqaat.

Taamaattumik tunngavissaqarluartutut isumaqarpugut nunatta namminerisamik pigisaanik sillimmasiisarfimmik pilersitsiniassagaluarutta iluaqutissartaasa aammalu aporfissartaasa suunerinik qulaajaanissamut. Ukiummi makku atorpavut siunissami namminersulivissinnaanermut suliniarluta, taamaattumik aningaasat kaaviiartitatta siunissami sapinngisag tamaat nunap iluani kaaviiarsinnaajuarnissaannik aqutissiorniartariaqarpugut.

Qulaajagassat arlaqassapput, aningaasaqarnermi sunniutigiumaagassat, inatsisiliornikkut suliassat, pingaartumik aningaasarsiornermi ingerlatsineq naalagaaffiup ataani inissisimammat, assersuutitut sillimmasiisarnermut aningaaseriveqarnermullu tunngasut qallunaat nunaanni aningaasatigut nakkutilliiveqarfimmit (Finanstilsynet) nakkutigisaapput.

Naalakkersuisut akissutaanni erserpoq marts 2017-mi Kalaallit Nunaanni sillimmasiisarnernut tunngatillugu inatsisilerinermut tunngasumik nalunaarusiamik pissarsisimasut, soqutiginarporlu nalunaarusiaq sukumiisumik misissussallugu uungalu suliamut ilanngullugu nalilersuutigissallugu.

Inuit Ataqatigiit isumaqarpugut susassaqrifiup qallunaat nunaannit nunatsinnut angerlaassinnaanissaanut namminerlu nunatsinnit ingerlanneqarsinnaanissaanut suliaq ingerlanneqartariaqartoq.

Siunnersuut taperserlutigu aappassaanneerseqartinnagu Aningaasaqarnermut Akileraartarnermullu ataatsimiititaliamut suliassanngortillugu ingerlateqqipparput.